



JUDICIAL SYSTEM MONITORING PROGRAMME

PROGRAMA MONITORIZASAUN SISTEMA JUDISIÁL

## ***Komunikadu Imprensa***

5 Marsu 2013

### **JSMP realiza workshop kona-ba Lei Kódigu Prosesu Penál no Demokrásia iha Eskola Sekundária Públiku Nú. 1<sup>o</sup> Ainaro**

JSMP liu husi Unidade Peskizador Legál (LRU) no Unidade Programa Observasaun Parlamentu (POP) iha loron 28 Feveireiru 2013 hala'o workshop kona-ba Lei Kódigu Prosesu Penál no Demokrásia iha Eskola Sekundária Nú. 1<sup>o</sup> Ainaro, Distritu Ainaro. Workshop ne'e partisipa husi estudante no profesór sira ho total hamutuk 50; kompostu hosi feto nain 20 no mane nain 30.

Iha matéria apresentasaun ba Prosesu Penál ko'alia kona-ba faze prosesuál 4, hanesan faze inkéritu, julgamentu, rekursu, no ezekusaun. Aleinde ne'e iha matéria kona-ba demokrásia ko'alia kona-ba sistema demokrásia ne'ebé aplika iha Timor Leste no kna'ar orgaun soberánia sira nian hanesan Prezidente Repúblika, Parlamentu Nasionál, Governu no Tribunál.

*Workshop ne'e importante tebes hodi hasa'e kuñesimentu estudantes sira nian kona-ba asuntu legál iha prosesu krime nian hametin sira nia koñesimentu kona-ba sistema demokrásia no prinsípiu separasaun poder ne'ebé aplika iha Timor Leste, dehan Luis de Oliveira Sampaio, Diretór Ezekutivu JSMP.*

Iha parte seluk Diretór Eskola nú. 1<sup>o</sup> Ainaro, Sr. Zesito Pião iha nia diskursu abertura haktuir katak nia parte orgullu tebes ho prezensa JSMP iha eskola ida ne'e, tanba JSMP bele fahe informasaun kona-ba lei no lala'ok sistema demokrásia iha Timor Leste. Nia mós husu atu JSMP bele kontinua fahe informasaun hanesan iha tempu oin mai iha sira nia eskola.

Estudantes sira partisipa ativu tebes iha diskusaun ne'e hodi kestiona kona-ba kazu pendente sira iha tribunál, inestu, prosedimentu kapturasaun hosi polísia, kazu violénsia doméstika inklui sistema kordenasaun servisu entre orgaun soberania sira, demokrásia no liberdade ne'ebé la iha limitasaun.

Atu hetan informasaun kle'an liu tan favor kontaktu:

Luis de Oliveira Sampaio  
Diretor Ezekutivu JSMP  
Email: [luis@jsmp.minihub.org](mailto:luis@jsmp.minihub.org)  
Landline: 3323883 / 77810637  
[www.jsmp.tl](http://www.jsmp.tl)